

七十二家集

沈隱侯集卷之十四

梁吳興沈約休文著

明閩漳張爕紹和纂

記

枳園寺刹下石記

佛教東流適末尤著始自洛京盛於江左晉故  
車騎將軍瑯琊王劭玄悟獨曉信解淵微於太  
祖文獻公清廟之北造枳園精舍其始則芳枳  
樹籬故名因事立雖房殿嚴整而瓊刹未樹邵

玄孫尚書僕射南徐州大中正奧深達法相洞  
了宗極勤誠外著仁隱內弘食不過中者一十  
一載雖翼務朝端而事隣柰園日者作翰湘州  
樹麾蠡服位與年升秩隨歲厚顧惟恩隆主盼  
寵結皇情任處東方寄深外屏徒欲盡能竭慮  
知無不爲下被民和上宣聖澤而自以力弱途  
遠終慙短効且義止今生報褰來果非所以酬  
鴻貺於冥津暢丹誠於遐劫自乘傳衡臯辭簪  
派渚誓於舊寺光樹五層捐割藩俸十遺其一

凡厥所收三十有六萬齊之永明六年六月三日  
蓋木運將啓之令辰上帝步天之嘉日乃抗  
崇表於蒼雲植重扃於玄壤仰願宸居納祐福  
履攸歸八神擎室萬祇翼體寶祚隆邈比固須  
彌靈算遐永齊軌常住諸聖延祥挹天和於少  
極藩王碩茂播宗英於梁楚羣后流克讓之風  
庶民垂可封之德含生愷樂物不天性嘉穀年  
登餘糧栖畝夷荒內附邊城解柝家備十善人  
懷六度魔衆稽顙外道屈膝抽薪止火折劍摧

鋒拯幽酸於無擇陟神化於有頂三界五道咸  
同斯願刊石重壤式昭厥心

齊竟陵王題佛光記

夫理貫空寂雖鎔範不能傳業動因應非形相  
無以感是故日華月彩炤曜天外方區散景咫尺塵方太祖皇帝濯襟慧水凝神淨域厭世珍  
陛遷靈寶地竟陵王諱洎明臺之下臨慟高山  
之方遠慕遘王鑾情殷雙樹永惟可以炳發神  
功崇高妙業莫若式金寫好資巧匠傳儀以皇  
齊之四年日子敬制釋迦像一軀尊麗自天工  
非世造色符留影妙越檀香俾穀林之思永旌

於萬劫用刊徽迹式垂不朽云爾

碑

桐栢山金庭館碑

天生靈爲貴有識斯同道天云及終天莫反故  
仙學之秘上聖攸尊啓玉笈之幽文貽金壇之  
妙訣駐景濛谷還光上枝吐吸烟霞變煉丹液  
出沒無方升降自己下栖洞室上賓群帝覩靈  
岳之驟啓見滄波之屢竭望玄淵而駿驅指蓬  
山而永驚芝蓋三重駕螭龍之蜿蜒雲車萬乘  
載旗旆之逶迤此蓋栖靈五嶽未暨夫三清者



也若夫上玄奧遠言象斯絕金簡玉字之書玄  
霜絳雪之寶俗士所不能窺學徒不敢輕慕且  
禁誓嚴重志業艱劬自非天稟上才未易可擬  
自惟凡劣識鑒鮮方徒抱出俗之願而無致遠  
之力卑尚幽栖屏棄情累留愛巖壑託分魚鳥  
塗愈遠而靡倦年旣老而不衰高宗明皇帝以  
上聖之德結宗玄之念忘其非薄曲賜提引未  
自夏汭固乞還山權憇汝南縣境固非息心之  
地聖主纘歷復蒙繫維永泰元年方遂初願遂

遠出天台定居茲嶺所憇之山實惟桐栢靈聖  
之下都五縣之餘地仰出星河上叅倒景高崖  
萬脊邃澗千廻因高建壇憑巖考室飾降神之  
宇置朝禮之地桐栢所在厥號金庭事曷靈圖  
因以名館聖上曲降幽情留信彌密置道士十  
人用祈嘉祉約以不才首膺斯任永棄人羣竄  
景窮麓結懇志於玄都望霄容於雲路仰宣國  
靈介茲景福延吉祥於清廟納萬壽於神躬又  
願道無不懷澤無不至幽荒屈膝戎貊稽顙息

鼓輟烽守在海外因此自勉兼遂微誠日久勤  
劬自強不已翹心屬念晚卧晨興食正陽於停  
午念孔神於中夜將三芝而延佇飛九丹而宴  
息乘鳧輕舉留舄忘歸以茲丹款表之玄極無  
曰在上日鑒非遠銘石靈館以旌厥心其辭曰  
道無不在若存若亡於惟上學理妙羣方用之  
日損言則非常儵焉靈化羽衣霓裳九重堯光  
三山璀璨日爲車馬芝成宮觀虹旌拂月龍輶  
漸漢萬春方華千齡始旦伊余菲薄竊慕隱淪

尋師講道結友問津東採震澤西遊漢濱依稀  
靈脊髣髴幽人帝明紹歷惟皇纂位屬心鼎湖  
脫屣神器降命凡底仰祈靈秘瞻彼高山興言  
覆賁啓基桐栢厥號金庭喬峰迴峭擘漢分星  
臨雲置壇駕岳開櫺闥塗蹇產林祈葱青誰謂  
應遠神道微密慶集宮闈祥流罕畢其久如地  
其恒如日壽同南山與天無卒樂生變煉外示  
無功少君飛轉密與神通因資假力輕舉騰空  
庶憑嘉誘永濟微躬

法王寺碑

昔周師集于孟津漢兵至于垓下翦商肇乎茲  
地殪楚由乎斯域慧雲匪由觸石法雨起乎悲  
心驅之仁壽度之彼岸濟方割於有頃樸旣燎  
于無邊陸旗風靡水陣雲披縈山爲堞失其九  
天之險負壑爲陁曾無一葦之閼昏師反接僞  
牧泥首掬指則河舟尙虛委甲則熊嶺非峻乃  
按兵江漢誓衆商郊因斯而運斗樞自茲而廓  
天步業隆於夏功高代殷濟橫流而臣九服握

乾綱而子萬姓眷言四海莫不來王此惟余宅  
寧止西顧臨朝夕之濬池帶長洲之茂苑藉離  
宮於漢舊因林光於秦餘迴廊敞匝複殿重起  
連房極睇周堵如雲銘曰

往劫將謝災難孔多炎炎烈火赫赫洪波聚爲  
丘岳散成江河俗緣浮詭眞諦遐長匪因希尚  
曷寄舟梁標功顯德事歸道場祁祁法衆同茲  
無我振錫經行祇林宴坐或期寂滅或念薪火  
惆悵三明徘徊四果

善館碑

至道玄妙無跡可尋寄言立稱已乖宗極神宇  
靈房於義非取九僊緬邈等級參差或藏形洞  
府或栖志靈岳達人獨徃之事志非易立餐松  
飲澗之情理難輕樹止欲漸去喧囂稍離塵雜  
於是旣加整葺營建堂宇北負崇岳南枕脩衢  
迴託人表雞犬相絕庭流松響戶接雲根指瓊  
樹而朝餐就瑤臺而夜息霓裳不反鳬舄忘歸  
朝九星謁羣帝悠哉邈乎與天地相畢矣

齊故安陸昭王碑

公諱緬字景業南蘭陵人也稷卨身佐唐虞有大功於天地商武姬文所以膺圖受籙蕭曹扶翼漢祖滅秦項以寧亂魏氏時乘於前皇齊程符於後靈源與積石爭流神基與極天比峻祖宣皇帝雄材盛烈名蓋當時考景皇帝含道居貞卷懷前代公含辰象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久



遠大之方率由斯至挹其源者游泳而莫測懷  
其道者日用而不知昭昭若三辰之麗于天滔  
滔猶四瀆之紀于地六幽允洽一德無爽萬物  
仰之而彌高千里不言而斯應若夫彈冠出仕  
之日登庸蒞事之年軍麾命服之序監督方部  
之數斯固國史之所詳今可得畧也水德方衰  
天命未改太祖龍躍俟時作鎮淮泗如仁夕惕  
之志中夜九迴龕世拯亂之情獨用懷抱深圖  
密慮衆莫能窺公陪奉朝夕從容左右蓋同王

子洛濱之歲實惟辟疆內侍之年起予聖懷發  
言中肯始以文學游梁俄而入掌綸誥蘭桂有  
芬清暉自遠帝出于震日衣青光方軌茅社俾  
侯安陸受瑞折珪遂荒雲野式掌儲命帝難其  
人公以宗室羽儀允膺嘉選協隆三善仰敷四  
德轉望之苑載暉龍樓之門以峻獻替帷宸寶  
掌喉膺奉待漏之書銜如絲之旨前暉後光非  
止恒授公以密戚上賢俄而奉職出納惟允劍  
璽增華伊昔帝唐九官咸事熊豹臨猷納言是

司自此迄今其任無爽爰自近侍式贊權衡而  
皇情眷眷慮深求瘼姑蘇奧壤任切關河都會  
殷負提封百萬全趙之衮服叢臺方此爲劣臨  
淄之揮汗成雨曾何足稱乃鴻鑒舊吳作守東  
楚弘義讓以勗君子振平惠以字小人撫同上  
德綏用申典疑獄得情而弗喜宿訟兩讓而同  
歸雖春申之失啓封疆鄧攸之緝熙氓庶不能  
尙也夏首藩要任重推轂衿帶中流地殷江漢  
南接衡巫風雲之路千里西通鄧鄧水陸之塗

三七是惟形勝間外莫先建廡作牧明德攸在  
乃暴以秋陽威以夏日澤無不漸螻蟻之穴靡  
遺明無不察容光之微必照由近而被遠自己  
而及物惠與八風俱翔德與五材並運遠無不  
懷邇無不肅邑居不聞夜吠之犬牧人不覩晨  
飲之羊譽表六條功最萬里還居近侍兼饗戎  
秩候府寄隆儲端任顯東西兩晉茲選特難羊  
琇願言而匪獲謝琰功高而後至升降二宮令  
績斯侯禁旅尊嚴主器彌固禹穴神臯地埒分

陝江左以來常遞斯任東渚鉅海南望秦稽淵  
藪胥萃藿蒲攸在貨殖之民千金比屋邪壘之  
內雲嶺萬家刑政繁舛舊難詳一南山羣盜未  
足云多渤海亂繩方斯易理公下車敷化風動  
神行誠恕旣孚鈎距靡用不待赭汗之權而奸  
渠必翦無假里端之籍而惡子咸誅被以哀矜  
孚以信順南陽葦枝未足比其仁潁川時雨無  
以豐其澤公攬轡升車牧州典郡感達民祇非  
待期月老安少懷塗歌里詠莫不歡若親戚芬

若椒蘭靡施每反行悲道泣攀車臥轍之戀爭  
塗忘遠去思一借之情愈久彌結方城漢池南  
顧莫重北指嶢潼平塗不過七百西接嶢武關  
路曾不盈千蠻陬夷徼重山萬里小則俘民畧  
畜大則攻城剽邑晉宋迄今有切民患烽鼓相  
望歲時不息推埋穿掘之黨所成羣慝法侮  
吏之人曾莫禁禦累藩咸受其弊歷政所不能  
裁加以戎羯窺窬伺我邊隙北風未起馬首便  
以南向塞草未衰嚴城於焉早閉永明八載疆

場大駭天子乃心北眷聽朝不怡揚旆漢南非  
公莫可於是驅馬原隰卷甲遄征威令首塗仁  
風載路軌躅清晏車徒不擾牛酒日至壺漿塞  
陌失義犬羊其來久矣徵賦嚴切唯利是求首  
鼠疆界災蠹彌廣公扇以廉風孚以誠德盡任  
棠置水之情弘郭伋待期之信金如粟而弗覩  
馬如羊而靡入雛雉必懷豚魚不爽由是傾巢  
舉落望德如歸椎髻髻首日拜門闕卉服滿塗  
夷歌成韻禮義旣敷威刑具舉彊民曠俗反志

遷情風塵不起囹圄寂寞富商野次宿秉停菑  
蜾蠃弗起豺虎遠跡北狄懼威關塞謐靜俱謀  
不敢東窺馳馬不敢南牧方欲振策燕趙席卷  
秦代陪龍駕於伊洛侍紫蓋於咸陽而遘疾彌  
留歛焉大漸耕夫釋耒桑婦下機參請門衢並  
走羣望維永明九年夏五月三十日辛酉歲春  
秋三十有七城府颯然庶察如實男女老幼大  
臨街衢接響傳聲不踰時而達於四境夷羣戎  
落幽遠必至望城拊膺震動郡邑並求入奉靈



楓藩司抑而弗許雖鄧訓致劈面之哀羊公深  
罷市之慕對而爲言遠有慚德神駕東還號送  
踰境奉觴奠以望靈仰蒼天而自訴震響成雷  
盈塗咽水公臨危審正載貽話言楚襲之情惟  
幾而彌固衛魚之心身亡而意結二宮軫慟遐  
邇同哀追贈侍中領衛將軍給鼓吹一部謚曰  
昭侯時皇上納麓在辰登庸伊始允副朝端兼  
掌屯衛聞凶哀震感絕移時因遘沈痾綿留氣  
序世祖日夜憂懷備盡寬譬勉膳禁哭中使相

望上雖外順皇旨內殷私痛獨居不御酒肉坐  
臥泣涕霑衣若此移年癯瘠改貌天倫之愛振  
古莫儔及俯膺天眷入纂絕業外命懿親台牧  
並建對繁弱以流涕望曲阜而含悲改贈司徒  
因謚爲邵王禮也惟公少而英明長而弘潤風  
標秀舉清輝映世學徧書部特善玄言聳悅之  
麗篆繡之則窮六義於懷抱究八體於毫端突  
思之微秋儲無以競巧取睽之妙流睇未足稱  
奇至公以奉上鳴謙以接下撫僚庶盡盛德之

容交士林忘公侯之貴虛懷博納幽關洞開宴  
語談笑情瀾不竭譽滿天下德冠生民蓋百代  
之儀表千年之領袖曾不憚留梁摧沓及豈唯  
僑終蹇謝興誰輟相而已哉凡我僚舊均哀共  
戚怨天德之無厚痛棠陰之不留思所以克播  
遺塵敝之穹壤乃刻石圖徽寄情銘頌其辭曰  
天命玄鳥降而生商是開金運祚始玉筐三仁  
去國五曜入房亦白其馬侯服周王本枝派別  
因萊命氏涉徐而東義均梁徙自茲以降懷青

拖紫崇基巖巖長瀾瀾瀾惟聖造物龍飛天步  
載鼎載革有除有布高皇赫矣仰膺乾顧景皇  
蒸哉寶曆洪祚喬嶽峻峙命世興賢應期誕德  
絕後光前幾以成務覺在民先位非大寶爵乃  
上天爰始濯纓清猷濟發升降文陛逶迤魏闕  
惠露霑吳仁風扇越涉夏踰漢政成期月用簡  
必從日新爲盛在上哀矜臨下莊敬草木不夭  
昆蟲得性我有芳蘭民胥攸詠羣夷蠢蠢巖別  
嶂分傾山盡落其從如雲挈妻荷子負戴咸羣

迴首請吏曾何足云昔聞天道仁罔不遂彼蒼  
如何興山止簣四牡方馳六龍頓轡斯民曷仰  
邦國殄瘁齊隕晏平行哭致禮趙徂昌國列邦  
揮涕况我君斯皇之介弟哀感徒庶慟興雲陛  
階毀留攢川汎歸軸競羞野奠爭攀去轂遵渚  
號追臨波望哭無絕終古惟蘭與菊塗由帝渚  
朱軒靡駕東首瑩園卽宮長夜逝川無待黃金  
難化鐘石徒刊芳猷永謝

豫章文憲王碑

世載冠冕之暉家開配天之業洪源邁於委水  
雲峰冠於削成公自天攸縱非待河岳道亞生  
知德備藏往摩赤霄而理翰望閭闔以上馳廻  
風處於襟袖宅山川於懷抱爰初弱冠藏器俟  
時康莊廣闢飾禮賢之館杞梓備收罄茲蘭之  
畹旣駕朱轡又敷袞職升降軒陛率由孝敬謙  
以備物貴以在身再握廟已三吐忘倦公德惟  
民望位冠朝首儀表瑰雄風神秀傑每至三元

首旦華喬在庭執玉端闈冠冕百辟外夷震聳  
猶單于之懼王商羣后瞻慕若衆星之俯日月  
雖復以周公之親居周公之任道格皇天光被  
四海而小善靡失輜德必從譬由畎澮匪讓所  
以森致江河土壤同歸故能鬱成嵩岱保翼三  
善弘正九代銘彼太常懸諸日月銘曰

大德風邁其美雲從事貴愈貶禮峻彌恭且有  
厚命車服以庸羽儀列辟冠冕羣龍周實多祐  
漢有餘慶奕奕皇族於斯爲盛公之綏之終和

且敬是惟宗國庶邦作詠



太尉王儉碑

瞻旦爽而齊軫軼夔龍而長驚百辟翹首譬列  
宿之仰望舒千里結轍若派流之宗江漢及宋  
道盛運鼎命將改而瞻焉所集未知適歸公高  
臥閑宇獨咤虛室眷龍顏以託夢詠日角以興  
言停傳巖之下懷滋水之上慨深版蕩念在濡  
足霸君亦慮屬一匡情降三顧卜匪熊羆唯人  
是與公深覩興廢妙識人英察榮光於河渚攀  
龍翼於雲漢傾方寸以奉國忘七尺以事君殊

文共會異軫同歸堆案盈几克庭滿室隨方引  
應斷決如流辭不輟響紙無停筆精明外朗神  
彩傍映矚矚接其光景風雲溢乎帷席囂喧總  
至大薄相填齊鑣共軫竝而不雜銘曰

悵公赫矣世載經綸四彼三傑六茲五臣德參  
世命道亞如仁屣步金門濯纓蘭疇激水上征  
培風鬱起

比丘尼僧敬法師碑

立言道往標情妙覺置想依空練心成學緼日  
悠長疏年緬邈風遷雷改斯理莫違神有殊適  
形無異歸歸泉結慟有愴徂暉松懸轉蓋山雨  
被衣載刊貞軌永播餘徽

沈隱侯集卷之十五

梁吳興沈約休文著

明閩漳張爨紹和纂

哀策文

齊明帝哀策文

龍輦旣撤備物已陳殯宮無夜夕燎終晨號環  
輓幄攀標應路容衛弗改軒檻如故望東川而  
不追仰昊天而自訴列聖同軌謚法樹聲爰詔  
掌牘式播遺英其辭曰

五曜在天遞作民主赫矣帝高蒸哉嗣武多難  
固業殷憂啓聖時惟我皇功符受命爰始濡足  
坐運機深鵬逝風舉龍動雲陰之郢南汭御豫  
西臨體茲大德懷此小心賓于四門四門穆穆  
納于百揆百揆肅肅德浸莖茶仁被比屋何遠  
何邇無思不服嗣君喪道不式典謨神器業業  
事等瞻烏民懷輿主后來其蘇皇天眷命授以  
籙圖臨朝凝睟昧旦丕顯斟酌前王擇其令典  
不言斯應不行斯踐路臺靡營離宮弗宴眷言

膠塹弘啓上庠軌儀四代祖述三王德暉內動  
英華外揚禮行罇俎義及幽荒仰庶天德降年  
永久北極齊光南山獻壽滄溟奄竭嵩岱皆朽  
沴非昊穹惟余之咎攀龍詎幾大隧玄玄厭世  
崇陞卽宮下泉殯階已遠素幕高褰端闢洞啓  
蜃紉徐前背朱闕以南轉乘翠龍而東度經原  
野之荒涼屬西成之云暮伐金鼓以清道揚悲  
笳而啓路極厚地而不追終蒼天而永慕蒼梧  
晦遠春徽不泯紀事寂寞龜書可循哲王違世

克播遺塵荷歟萬古暉光日新

論議

齊武帝論議

臣聞天德平分而四時之名或異聖功一揆而  
皇王之稱不同蓋跡因事隨名由義立堯臣禹  
佐咸率茲典伏惟盡寂窮微含神獨照德茂始  
衷之主道冠初耜之君含精靈於五緯駕貞明  
於三象初九勿用英氣凌雲負揭日月仰揚霄  
漢龍姿鳳采煥若麗天登庸在試盛績雲舉雖  
屈景潢汗降情尺木而極世濟民浚發懷抱昔



成湯百家仁被比屋文王十里化先寡妻前聖  
後賢重規沓矩震雄圖於九江播靈威於夏汭  
旌旆未麾鯨鯢自殞弗勞羗棘之長無待六事  
之人義等伐謀功高善陣建有國之符成定鼎  
之業會朝清明事資於牧野受命作周非止於  
西伯視瞻寢門孝德光備守器宗祧元良載遠  
嗣大寶以君百辟敷景化以致隆平守在四夷  
威行海內囹圄寂寞禮讓交興八柄馭下九官  
咸事臨朝凝默尊嚴若神風行日烜無思不暢

至仁與造化爭流靈威與雷霆齊軌上貫蒼昊  
下洞深泉春無淒風夏無苦雨時若罔愆多稔  
如積三革不累五刃不砥庠塾大格儒雅雲集  
訓閱得宜蒐狩有序丹雘青丘之野跂踵反舌  
之民浮深駕阻廻首革面北夷畏力獻琛內款  
不藉終軍之使無假絕漠之威嘉祥霧合秘瑞  
泉涌史不輟文簡無虛日方當垂七曜之旗駕  
八龍之乘望禮中嶽肆覲羣后造化不仁穆卜  
愆應慕切遺弓哀同過密晦朔不居殯宮將啓

勒茲大名宜盡徽極

齊明帝謚議

臣聞君德靡二辟王之名不一聖功無爽堯禹  
之稱或殊兼以極世寧亂致平未必同道崇墀  
增祧嘉號不可相襲伏惟自天誕睿英聖在躬  
皇矣之符夙著蒸哉之謠早集賓門納揆天平  
地成自南自北無思不遑在屬負圖道揚末命  
值嗣主狂凶人倫道盡宗社貼危瞻烏靡託國  
難立長亂極治刑四海樂推三靈以眷東向而  
讓天下功高代入流涕而膺寶位如就重負日

是劬勞躬親庶事撫辜納隍之念義同於罪已  
振民厚下之情無廢於終食聰明神武逖聽邇  
聞萬目備張絃綱靡漏御轡不迷寧藉聽於襄  
野大川可濟不待備於舟楫崢嶸之下澤靡不  
懷寥廓之上明無不燭包以宇宙潤以風雨霜  
露所交人跡所至百姓仰之而不知其始萬物  
用之而罔識其終上庠廢業忽焉已久三載弗  
爲淪弛將及臨朝引領思隆雅訓貴遊胥萃俊  
造成羣方將驅世反本旣仁且壽告成東嶽高

宴汾陽造化不仁厭世云及放勛之慕不追賁  
鄉之思空遠殞宮將撤輶軫難留英聲茂實然  
是乎在

梁德皇后謚議

表號垂名義昭不朽先皇后應祥月德比載坤  
靈柔範陰化儀形自遠倪天作合義先造舟而  
神猷夙掩所隔升運宜式遵景行用昭大典謹  
按謚法忠和純備曰德貴而好禮曰德宜崇曰  
德皇后

墓誌銘

齊太尉文憲王公墓銘

德被九官功苞十亂帝圖必舉皇猷諧煥斯謂  
國禎是惟民幹翺翺禮園優游文館秘義煙涵  
瓊辭雨散揆路揚輝台庭改觀方翊隆平變茲  
天綱福履每愆降年多爽微言永謝庶僚誰長  
饒吹罷音松風代響



齊太尉徐公墓誌

公美風儀善言笑愛重琴瑟流連泉石拓宇東  
郊曖然閑素榮貴之來無槩懷抱任居端揆萬  
務同歸簿領盈前囂塵滿席直舉枉錯虛來實  
反天道不仁與善褻應

丞相長沙宣武王墓銘

山岳鎮地日月麗天鄰幾者庶亞極稱賢哉哉  
哲人寔惟天縱德基內美功成日用亦旣東轅  
實極朝難迅鋒雷駭霜戈電斷震主必危功高  
不賞哀動上霄痛銘玄壤聖武爰發後恥申冤  
大禮空備幽駕莫援

司徒謝朓墓銘

嶽神昔降和氣今鍾以彼天爵鬱爲人龍崇基  
往峻世德今重漢車作傳靈位攸待我君應符  
非公莫宰華袞旣襲輕蘿自改形雖廟堂心猶  
江海經邦已備皇情廻屬素緋輟御玄雲罷曲

尙書右僕射范雲墓銘

合契興王匪勞物色乘風鬱起化成龍翼乃作  
喉膺帝猷必舉乃作銓衡彝倫有序北京咀峻  
東川廻薄蘊吾名臣終天彝作

太常卿任昉墓銘

天才俊逸文雅弘備心爲學府辭同錦肆含華  
振藻鬱焉高致川谿望歸巖阿待闕幽光忽斷  
窮燈黯滅爾有令問蘭薰無絕

行狀

齊司空柳世隆行狀

公稟靈華嶽幼挺珪璋清襟素履發乎齠髫及  
長風質洞遠儀止祥華動容合矩吐言被律時  
沈攸之狼據陝西氣陵物上而太祖登庸作宰  
天歷在躬攸之播封豕之情總全荆之力兕甲  
十萬鐵馬千群水陸長驚志窺皇邑公抗威川  
渙勇略紛紜顯晦有方出沒無緒攸之乃反旆  
亘圍親受矢石增櫓乘埤嚴衝駕雉雲輶俯闕

地穴斜通半藏晚  
食負戶晨汲公  
乃綏衆以武  
應敵以奇  
靈鋒電曜威策雲舉  
事切三版之危  
氣損九天之就  
殘寇外老逆黨內  
摧焚舟委甲  
掬指宵遯公風標  
秀徹器範弘潤  
茂乎辭彩雅  
善鼓琴摛純蔡之  
高芬纂鍾嵇之妙  
曲雖嬰拂  
世務而素業無改  
臨姑蘇而想八桂  
登衡山而  
望九疑  
七紆邦組三臨蕩  
甸五職璫扇一司百  
揆固可以齊衡八  
凱方駕五臣

齊臨川王行狀

公遵玄源於陵壑稟黃中之正氣其性逸其神  
凝端華表美弱齒弘貴著乎將立雲虛景暖岳  
秀川渟蘭桂不踰其質珪璋未究其美幼而悅  
學業茂從師洽貫書場該綜文圃清暉秘譽燭  
野光朝



齊禪林寺尼淨秀行狀

比丘尼釋淨秀本姓梁氏安定烏氏人也其先  
出自少昊至伯翳佐禹治水賜姓嬴氏周孝王  
時封其十六世孫非子於秦其曾孫秦仲爲宣  
王侯伯平王東遷封秦仲少子於梁是爲梁伯  
漢景帝世梁林爲太原太守徙居北地烏氏遂  
爲郡人焉自時厥後昌胤阜世名德交暉蟬冕  
疊映漢元嘉元年梁景爲尚書令少習韓詩爲  
世通儒魏時梁爽爲司徒左長史秘書監轉極

群書善談玄理晉太始中梁闡爲涼雍二州刺史卽尼之廼祖也聞孫撫晉范陽王虓驃騎參軍事漁陽太守遭永嘉蕩析淪於僞趙爲秘書監征南長史後得還晉爲散騎侍郎子疇字道度征虜司馬子粲之仕宋征虜府參軍事封龍川縣都亭侯尼卽都亭侯之第四女也挺慧悟於曠劫體妙解於當年而性調和綽不與凡孩孺同數弱齡便神情峻徹非常童稚之伍行仁尙道洗志法門至年十歲慈念彌篤絕粉黛之

容棄錦綺之翫誦經行道長齋蔬食年十二便  
求出家家人苦相禁抑皆莫之許於是心祈冥  
感專精一念乃屢獲昭祥亟降瑞相第四叔超  
獨爲先覺開譬內外故雅操獲遂上天性聰睿  
幼而超羣年至七歲自然持齋家中請僧行道  
聞讀大涅槃經不聽食肉於是卽長蔬不噉二  
親覺知若得魚肉輒便棄去昔有外國曾練道  
人出於京師往來梁舍便受五戒勤翹奉持未  
嘗違犯日夜恒以禮拜讀誦爲業更無餘務及

手能書常自寫經所有財物唯克功德之用不  
營俗好少欲入道父母爲障遂推流歲月至年  
二十九方獲所志落髮青園服膺寺主上事師  
虔孝先意承旨盡身竭力猶懼弗及躬脩三業  
夙夜匪懈僧使衆役每居其首精進劬勤觸事  
關涉有開士馬先生者於青園見上卽便記云  
此尼當生堯率天也又親於佛殿內坐禪同集  
三人忽聞空中有聲狀如牛吼二尼驚怖迷悶  
戰慄上惓然自若徐起下牀歸房執燭檢聲所

在旋至拘欄二尼便聞殿上有人相語云各自  
避路某甲師還後又於禪房中坐伴類數人一  
尼鼾眠此尼於睡中見有一人頭屈于屋語云  
勿驚某甲師也此尼於是不敢復坐又以一時  
坐禪同伴一尼有小緣事暫欲下牀見有一人  
抵掌止之曰莫撓某甲師於是閉氣徐出歎未  
曾有如此之事比類甚繁既不卽記悉多漏忘  
不得具載性愛戒律進止俯仰必欲遵承於是  
現請曜律師講內有思惟但有直一千心中憂

慮事不辦夜卽夢見鵲鵲鵲雀子各乘車車並安軒車之大小還稱可鳥形同聲唱言我助某甲尼講去旣寤歡喜知事當成及至就講乃得七十檀越設供果食皆精後復又請頴律師開律卽發講日清淨髡水自然香如水園香氣深以爲欣旣而坐禪得定至夜中方起更無餘伴便自念言將不犯獨卽諮律師律師荅云無所犯也意中猶豫恐違失且見諸寺尼僧多有不如法乃喟然歎曰嗚呼鴻徽未遠靈緒稍隕

自非引咎責躬豈能導物卽自懺悔行摩那埵  
於是京師二部莫不咨嗟云如斯之人律行明  
白規矩應法尙爾思愆何況我等動靜多過而  
不慚愧者哉遂相率普懺無有孑遺又於南園  
就穎律師受戒卽受戒日淨盥水香還復如前  
青園諸尼及以餘寺無不更受戒者律師於是  
亦次第詣寺敷弘戒品闡揚大教故憲軌遐流  
迄屈于今穎律師又令上約語諸寺尼有高牀  
俗服者一切改易上奉旨制勒無不祇承律藏

之興自茲更始後又就三藏法師受戒清淨水  
香復如前不異青園徒衆旣廣所見不同師已  
遷背更無覲侍於是思別立住處可得外嚴聖  
則內窮冥默者以宋大明七年八月故黃脩儀  
及南昌公主深崇三寶敬仰德行初置精舍上  
麻衣弗溫藿食忘饑躬執泥瓦盡勤夙夜以宋  
泰始三年明帝賜號曰禪林蓋性好閒靜冥感  
有徵矣而制龕造像無不畢備又寫集衆經皆  
令具足裝潢染成悉自然有娑羅伽龍王兄弟



二人現迹彌日不滅知識往來盡覩瞻覩招納  
同住十有餘人訓化獎率皆令禪誦每至奉請  
聖僧菓食之上必有異迹又於一時虔請聖衆  
七日供養禮懺始訖攝心運想卽見兩外國道  
人舉手共語一云呿羅一云毗呿羅所著袈裟  
色如桑椹之熟因卽取泥以壞衣色如所見倣  
於是遠近尼僧並相倣效改服間色故得絕於  
五大之過道俗有分者也此後又請阿耨達池  
五百羅漢日日凡聖無遮大會已近二旬供設

既豐復更請罽賓國五百羅漢足上爲干及請  
凡僧還如前法始過一日見有一外國道人衆  
僧悉皆不識於是試相借問自云從罽賓國來  
又問來此幾時荅云來此一年也衆僧覺異令  
人守門觀其動靜而食畢乃於宋林門出使人  
逐視見從宋林門去行十餘步奄便失之又嘗  
請聖僧浴噐盛香湯及以雜物因而禮拜內外  
寂默卽聞噐稀杓作聲如用水法意謂或是有  
人出便共往看但見水杓自然搖動故知神異

又曾夜中忽見滿屋光明正言已曉自起開戶  
見外猶闇卽更閉戶還牀復寢久久方乃明也  
又經違和極篤忽自見大光明遍於世界山河  
樹木浩然無礙欣爾獨笑傍人怪問具陳所見  
卽能起行禮拜讀誦如常無異又於一時復違  
和亦甚危困忽舉兩手狀如捧物語傍人不解  
問言爲何所捧荅云見寶塔從地出意欲接之  
幡花伎樂無非所有於是疾恙豁然而除都無  
復患又復違和數日中亦殊綿悞恒多東向視

合掌向空於一時中急索香火移時合掌卽自  
說云見彌勒佛及與舍利弗目連等諸聖人亦  
自見諸弟子數甚無量滿虛空中須臾彌勒下  
生翅頭末城云有人持幡華伎樂及三臺來迎  
於此上幡華伎樂非世間比半天而住一臺已  
在半路一臺未至半路一臺未見但聞有而已  
爾時已作兩臺爲此非故卽更作一臺也又云  
有兩樹寶華在邊人來近牀語莫壞我華自此  
之後病卽除損前後遇疾恒有瑞相或得涼風

或得妙藥或聞異香病便卽愈疾瘥之爲理都  
以漸謦然而去如此其數不能備記又天監三  
年一夏違和於晝日眠中見虛空藏菩薩卽自  
圍繞誦唄唄聲徹外眠覺所見卽除又白日卧  
開眼見佛入房旛蓋滿屋語傍人令燒香了自  
不見上以天監五年六月十七日得病苦心悶  
不下飲彭城寺令法師以六月十九日夜得夢  
見一處謂是堯率天上住止嚴麗非世間比言  
此是上住處卽見上在中於是法師有語上上

得生好處當見將接上是法師小品檀越勿見  
遺棄上卽荅云法師丈夫又弘通經教自應居  
勝地某甲是女人何能益法師又云不如此也  
雖爲丈夫不能精進持戒不及上時體已轉惡  
與令法師素疎不堪相見病旣稍增飲粥日少  
爲治無益漸就綿悞至七月十二日爾時天雨  
清凉悶勢如小退自云夢見迎來至佛殿西頭  
人人捉旛竿猶車在地旛之爲理不異世間隊  
擔鼓旗旛也至二十日便絕不復進飲粥至二

十二月令請相識衆僧設會意似分別至二十  
五日云見十方諸佛遍滿空中至二十七日中  
後泯然而臥作兩炊久方復動轉自云上堦率  
天見彌勒及諸菩薩皆黃金色上手巾自有一  
琉璃清淨甕可高三尺許以上彌勒卽放光明  
照于上身至堦率天亦不見飲食自然飽滿故  
不復須人間食也但聞人間食皆臭是以不肯  
食於彼天上得波利麤將還意欲與令法師有  
人問何意將麤去荅云欲與令法師是人言令

法師是人中果報那得食天上食不聽將去旣而欲見令法師閒居上爲迎法師來相見語法師可作好菜食以餉山中坐禪道人若脩三業方得生兜率天耳法師不坐禪所以令作食餉山上道人者欲使與坐禪人作因緣也自入八月體中亦轉惡不復說餘事但云有三十二童子一名功德天二名善女天是迦毗羅所領恒來在左右與我驅使或言得人餉飲食令衆中行行之復云空中晝夜作伎樂鬧人耳也



沈隱侯集卷之十六

梁吳興沈約休文著

明閩漳張爕紹和纂

文

懺悔文

弟子沈約稽首上白諸佛衆聖約自今生已前  
至于無始罪業參差固非詞象所筭識昧往緣  
莫由證舉爰始成童有心嗜慾不識慈悲莫辨  
罪報以爲毛羣鱗品事允庖厨無對之緣非惻

隱所及晨劉暮爚巨月隨年賺腹填虛非斯莫  
可兼曩昔蒙稚精靈靡達遨戲之間恣行天暴  
蠢動飛沈罔非登俎儻想逢值橫加剿撲却數  
追念種彙寔蕃遠憶想間難或詳盡又暑月寢  
卧蚊蚋嗜膚忿之于心應之于手歲所殲殞略  
盈萬計手因怒運命因手傾爲殺之道事無不  
足迄至于今猶未頓免又嘗竭水而漁躬事網  
罟牽驅士卒懽娛賞會若斯等輩衆夥非一黨  
隸賓遊愆青交互或盜人園實或偷人芻豢弱

性蒙心隨喜讚悅受分吞賊皎然不昧性愛墳  
典苟得忘廉取非其有卷將二百又綺語者衆  
源條繁廣假妄之愆雖免大過微觸細犯亦難  
備陳又追尋少年血氣方壯習累所纏事難排  
豁淇水上宮誠無云幾分桃斷袖亦足稱多此  
實生死牢筭未易洗拔灌志慘舒性所同稟遷  
怒過嗔有時或然厲色嚴聲無日可免又言謹  
行止曾不尋研觸過斯發動淪無紀終朝紛擾  
薄暮不休來果昏頑將由此作前念甫謝後念

復興尺波不息寸陰驟往愧悔攢心罔知云厝  
今於十方三世諸佛前見在衆僧大衆前誓心  
尅已追自悔責收遜前愆洗濯今慮校身諸失  
歸命天尊又尋七尺所本大微是構折而離之  
莫知其主雖造業者身身隨念滅而念念相生  
離續無已往所行惡造既由心行惡之時其心  
旣染旣染之心雖與念滅往之所染卽成後緣  
若不本諸眞諦以空滅有則染心之累不卒可  
磨今者興此愧悔磨昔所染所染得除卽空成

性其性既空庶罪無所託布髮頂禮幽顯證成  
此念一成相續不斷日磨歲瑩生生不休迄至  
道場無復退轉又彼惡加我皆由我昔加人若  
不滅此重緣則來惡彌熾當今斷絕永息來緣  
道無不在有來斯應庶達今誠要之咸達

千僧會願文

弟子沈約上白十方諸佛十方諸大聖今日見  
前衆僧三界非有五陰皆無四倒十纏共相和  
合一切如電揮萬劫於俄頃丘井易淪終漂沈  
於苦岸迷塗遽遠弱喪忘歸區區七尺莫知其  
假耳目之外謂爲空談靡依靡歸不信不受生  
靈一謝再得無期約所以撫心自慙臨踐非譬  
者也至聖凝寂無迹可尋緣應所感事惟拯物  
持鉢安行出彼祇樹不逾停午以福衆生芳塵

餘法峩然未改約以往夏蓮羅痾疾帝上哀矜  
深垂愍慮以月次徂暑日在丙寅仰會千僧於  
其私宅隆茲重施弗知所限既已奉祇洪德又  
思自罄家財一舉盈千力難私辦稍而後滿事  
或易克草堂約法師於所住山寺爲營八集其  
一仰憑上定林寺祐法主今月二十九日第十  
會集百僧於所創田廬福不唐捐聞之經訓心  
路皎然又過於此凡有涓毫應證來業無巨無  
細咸歸聖主仰願十方共明此誓豈足少酬天

眷蓋以微寄誠心云爾





寒蔣山廟文

我皇體天御宇望日表尊備樂變乎笙鏞鬱禮  
華於俎豆邇無不懷遠無不肅鳥革玄素之容  
草移丹綠之狀泉露收味日月重光仰惟大王  
年踰二百世兼四代揚玉將布瑤席秦梁楚趙  
之巫祀瓊茅而延佇燕衛宋鄭之音結流風而  
成曲九嶷之乘蔽日三山之駕若雲

冠子祝文

蠲茲今日元服肇加成德旣舉童心自化行之  
則至無謂道賒敦以秋實食以春華無耻下問  
乃敎高車子孫千億廣樹厥家

爲文惠太子禮佛願疏

維年月朔日皇太子某稽首和南十方諸佛一切賢聖夫至理可祈必憑誠於正覺極妙有感乃歸仰於真如然後取證現前獲驗茲日去歲皇帝暫虧御膳小廢乾行四海震惶百司戰悚諱歷劫多幸夙世善緣忝生王家叨守儲嗣臣子心地倍用焦迫禁門旦啓欣問豎之安寢靡早闢訪饕夫之宰祇樹獨園伏膺下拜伽藍精舍繞足頂禮百神警衛萬福具臻曾不信宿聖

躬和愈豈非三寶之弘慈十號之法力旣而天  
縱心欲誠願克果今於崇正殿奉還法會千僧  
仍留百僧八關行道又度二士同日出家惟願  
藉此功德奉資皇帝陛下壽與南山共久年將  
比極俱長道懋農軒德高堯舜上界八萬之劫  
可期下方七百之祚未擬元良之位長守膝下  
之懽上嗣之所永保懷袖之愛以茲法田奉申  
宮皇后殿下福履攸善無思不屆天母之德厚  
載不能加任姒之盛坤儀寧足匹末及諸王妃

主宮掖嬪房未來因緣過去眷屬並同茲辰預  
此慈善又普爲積苦餓鬼受舉畜生三途八難  
六道十惡水陸蠢動山藪翺飛濕生化生有想  
無想皆藉今日慈悲咸遣沉淪人天咸受幽顯  
證明庶憑衆力共相津濟隨膺

爲文惠太子解講疏

皇太子以建元四年四月十五日集大乘望僧  
於玄圃園安居寶地禁苑皆克供具珍饈綺榭  
施佛及僧震玄音於六宵暢微言於永劫三達  
宣其妙果十住讚其祥緣踐二氣而業升離九  
旬而功就暨七月旣望乃敬捨寶軀爰及輿冕  
自縵已降凡九十九物願以此力普被幽明帝  
室有嵩華之固蒼黔饗仁壽之福若有淪形苦  
海得隨理悟墜體翺塗不遠斯復十方三世咸

證伊言茲近言或騫無取正覺

爲齊竟陵王發講疏并頌

大矣哉妙覺之爲妙也無相非色空不可極而  
立言垂訓以汲引爲方慈波慧水雖可漑而莫  
知其源者也靈篇寶籍遠探龍藏蓋無得而言  
焉至于義指天山之表文隱交河之外又非斷  
籌所能筭也逮于祇樹菴園之妙吼四諦一乘  
之正說重譯而通中土莫不恒沙之一焉而詞  
源海廣理塗靈奧雖字流附響萬軫同起分條  
散葉離文折句未或暨其萬一也竟陵王殿下



神超上地道冠生知樹寶業於冥津凝正解於  
冲念若夫方等之靈邃甘露之深玄莫有不遊  
其塗而啓其室也秘藏之被東國者靡不畢集  
皆繕以寶練文以麗篆凝光瓊筭炫彩瑤滕思  
欲敷震微言昭感末悟乃以永明元年二月八  
日置講席於上邸集名僧於帝畿皆深辨真俗  
洞測名相分微靡滯臨疑若曉同集於邸內之  
法雲精廬演玄音于六宵啓法門於千載濟濟  
乎寶曠代之盛事也自法王已降暨于聽僧條

載如左以記其事焉乃作頌曰

十號神寂三達空玄迹由聖隱教以慈宣風飭  
緒法昭晰遺筌標聲妙住騰華寶蓮文摘龍藏  
義溢中天惟王稟照道冠增璿星羅寶幄雲開  
梵筵思馳春馬理折秋蟬靈場絢彩正水興蓮  
乘茲上果永導芳緣

爲齊竟陵王解講疏

夫憑形輝化必由委氣之塗因方導理必同肖  
天之質是以表靈邃瑞誕聖王宮駐彩辰緯停  
華日月故能積慈成聖累妙成空坦照路於道  
場拔迷根於苦岸弟子蕭子良滌盥煩襟栖情  
正業肅萃僧英敬敷慧典密藏奧文雲開雨散  
今魄首丹達日弦上朔止步凝想空明屬念雖  
神迹稍緬而遺塵在茲乃飾筵藻殿張帷盛邸  
絜誠祇事建斯寶集蘭泉波涌芳藹雲廻秘理

探微玄况悠邈宗條旣舉窮功允就論堂卷座  
義鼓停音乘此芳緣將升上佳十方三世有證  
無爽

又

夫妙極衆象湛思必通理冠羣方有感斯應自  
鸞音輟唱圓光寢輝委華之相不傳踊地之符  
已遠行言入道事難於造次一悟階空効隔於  
俄頃若非積毫成仞累燭爲明無以方軌慧門  
維舟法岸弟子是用夕惕載懷惟日不足者也  
故敬集名僧演敷奧籍震微起滯輪動雲迴月  
殿含呂魄弦上日甘露旣窮輟言寶座卷文罷  
席衣屣相趨仰惟先后稟靈娥德叶景軒度道

載華嶽化洽汾陰早棄蘭宮夙違椒掖千乘不  
追萬鍾靡及終天之慕不續於短年歆報之誠  
恩隆於永劫敬捨軀服以克供施藉此幽通控  
情竅覺仰願聖靈速登寶位越四天之表記十  
號之尊惟茲三世咸證於此敢普丹衷庶符皎  
日

爲南郡王捨身疏

弟子蕭王上白諸佛世尊道德僧衆夫色固無  
象觸必歸空三世若假八微終散雖復迴天震  
地之威窮於寂滅齊冠楚組之麗靡救埃壤而  
嗜慾易繁每疚心術捨施難弘用迷假照弟子  
樹因曠劫嚮報茲生託景中璇聯華日彩玉組  
鳳紆蕃麾早建蘭池紫燕之乘擾於外閑黼帳  
翠帷之飾光於中寢徒以心源尚滯情路未昭  
識謝兼忘理慚獨悟不能叶調五氣綏御六神

霜暑或愆風露時舛是以敷襟上寶栖誠妙覺  
敬捨肌膚之外凡百一十八種當令經衛風理  
府絡時順萬祉雲翔百妖窮滌望北極而有恒  
瞻南山而同永又願宸居納祐則天均慶少陽  
介福儼日承休儲妃閨膺祥之符皇枝廣惟祺  
之祚敬飾崇薨嚴置寶幄仰延息心旁旅清信  
勗茲弘誓證其幽疑庶可以感降禎和招對靈  
應玄塗匪昧要之無爽



捨身願疏

優婆塞沈君敬白十方三世諸佛本師釋迦如

來安養阿彌陀世尊

云

云一切衆聖今日道俗

諸大賢德夫形非定質衆緣所聚四微不同風  
火亦異析而離之本非一物燕肝越膽未足爲  
譬靜念求我無時可得而積此淪昏生生不已  
一念儻值曾未移時障習相蕩旋迷厥路橫指  
空呼名之爲有豐已傷物日夜靡休蓄身外之  
財以充其慾攘非已之分用成其侈豈直溫肌

陷腹若此而已哉至於積篋盈藏未嘗登體溢  
俎克庖旣飫斯棄曾不知粟帛所從事非因已  
悠悠黔首同有其分離多共寡猶或未均我若  
有餘物何由足仁者之懷不應若此侵他之財  
世稱爲盜盜之甚者孰過於斯幽顯推求無一  
或可君仰藉時來久乘休運玉粒晨炊華燭夜  
炳自此迄今歷年三十遂乃服冕榮國裂土承  
家潤盈身已慶流僕妾室非懸磬俸有兼金救  
寒止於重裘而笥委餘襲冬夜旣蒙累璽而燭

有羸衾自斯已上侈長非一雌等彼豪家其陋  
已甚方諸窶室所適寔多悟此非常事由諸佛  
有懷捨散宜光道場饑寒困苦爲患乃切布滿  
州縣難悉經緣其當稱力因事一旦隨年頭目  
髓腦誠難輕慕虧已贍物未易頓行誓欲廣念  
深恩積微成著施路檀門冀或能踐以大梁天  
監之八年年次玄枵日殷鳥度夾鍾紀月十八  
在於新所創蔣陵皇宅請佛及僧髣髴祇樹息  
心上士凡一百人雖果謝菴園餽非香國而竭

粒山蔬可同屬。歷兼捨身資。服用百有一十七。  
種微自損撤。以奉現前衆。僧夫室家患。苦刀俎。  
非切制除蕭散。形質超然蠢。彼羣生咸有佛性。  
不因翦削。此路莫由緣。業舛互。世諦煩記變形。  
改飾卽事爲難。故關以八支。導彼清信。一日一  
夜。同佛出家。本弘外教。事非僧法。而世情乖舛。  
同迷斯路。招屈名僧。寘之虛室。主人高卧。取逸  
閒堂。呼爲八關。去之實遠。雖有供施之緣。而非  
斷漏之業。約今謹自卽朝至于明旦。排遺俗累。

一同善來分留上德最成微志藉此輕因庶證  
來果功德之言非所敢及

附錄

沈約傳

陳姚察

沈約字休文吳興武康人也祖林子宋征虜將軍父璞淮南太守璞元嘉末被誅約幼潛竄倉赦免旣而流寓孤貧篤志好學晝夜不倦母恐其以勞生疾常遣減油滅火而晝之所讀夜輒誦之遂博通羣籍能屬文起家奉朝請濟陽蔡興宗聞其才而善之興宗爲郢州刺史引爲安西外兵參軍兼記室興宗嘗謂其諸子曰沈記

室人倫師表宜善事之及爲荊州又爲征西記  
室參軍帶關西令興宗卒始爲安西晉安王法  
曹參軍轉外兵並兼記室入爲尚書度支郎齊  
初爲征虜記室帶襄陽令所奉之王齊文惠太  
子也太子入居東宮爲步兵校尉管書記直永  
壽省校四部圖書時東宮多士約特被親遇每  
直入見景斜方出當時王侯到宮或不得進約  
每以爲言太子曰吾生平懶起是卿所悉得卿  
談論然後忘寢卿欲我夙興可恒早入遷太子

家令後以本官兼著作郎遷中書郎本邑中正  
司徒右長史黃門侍郎時竟陵王亦招士約與  
蘭陵蕭琛琅邪王融陳郡謝朓南鄉范雲樂安  
任昉等皆遊焉當世號爲得人俄兼尙書左丞  
尋爲御史中丞轉車騎長史隆昌元年除吏部  
郎出爲寧朔將軍東陽太守明帝卽位進號輔  
國將軍徵爲五兵尙書遷國子祭酒明帝崩政  
歸冢宰尙書令徐孝嗣使約撰定遺詔遷左衛  
將軍尋加通直散騎常侍永元二年以母老表



求解職改授冠軍將軍司徒左長史征虜將軍  
南清河太守高祖在西邸與約遊舊建康城平  
引爲驃騎司馬將軍如故時高祖勲業旣就天  
人允屬約嘗扣其端高祖默而不應佗日又進  
曰今與古異不可以淳風期萬物士大夫攀龍  
附鳳者皆望有尺寸之功以保其福祿今童兒  
牧豎悉知齊祚已終莫不云明公其人也天文  
人事表革運之徵永元以來尤爲彰著識云行  
中水作天子此又歷然在記天心不可違人情

不可失苟是歷數所至雖欲謙光亦不可得已  
高祖曰吾方思之對曰公初杖兵樊沔此時應  
思今王業已就何所復思昔武王伐紂始入民  
便曰吾君武王不違民意亦無所思公自至京  
邑已移氣序比於周武遲速不同若不早定大  
業稽天人之望脫有一人立異便損威德且人  
非金玉時事難保豈可以建安之封遺之子孫  
若天子還都公卿在位則君臣分定無復異心  
君明於上臣忠於下豈復有人方更同公作賊

高祖然之約出高祖召范雲告之雲對略同約  
旨高祖曰智者乃爾暗同卿明早將休文更來  
雲出語約約曰卿必待我雲許諾而約先期入  
高祖命草其事約乃出懷中詔書并諸選置高  
祖初無所改俄而雲自外來至殿門不得入徘徊  
壽光閣外但云咄咄約出問曰何以見處約  
舉手向左雲笑曰不乖所望有頃高祖召雲謂  
曰生平與沈休文群居不覺有異人處今日才智  
縱橫可謂明識雲曰公今知約不異約今知

公高祖曰我起兵於今三年矣功臣諸將實有其勞然成帝業者乃卿二人也梁臺建爲散騎常侍吏部尙書兼右僕射高祖受禪爲尙書僕射封建昌縣侯邑千戶常侍如故又拜約毋謝爲建昌國太夫人奉策之日左僕射范雲等二十餘人咸來致拜朝野以爲榮俄遷尙書左僕射常侍如故尋兼領軍加侍中天監二年遭母憂輿駕親出臨弔以約年衰不宜致毀遣中書舍人斷客節哭起爲鎮軍將軍丹陽尹置佐史

服闋遷侍中右光祿大夫領太子詹事揚州大  
中正關尚書八條事遷尚書令侍中詹事中正  
如故累表陳讓改授尚書左僕射領中書令前  
將軍置佐史侍中如故尋遷尚書令領太子少  
傅九年轉左光祿大夫侍中少傅如故給鼓吹  
一部初約久處端揆有志台司論者咸謂爲宜  
而帝終不用乃求外出又不見許與徐勉素善  
遂以書陳情於勉勉爲言於高祖請三司之儀  
弗許但加鼓吹而已約性不飲酒少嗜欲雖時

遇隆重而居處儉素立宅東田矚望郊阜嘗爲  
郊居賦尋加特進光祿侍中少傅如故十二年  
卒官時年七十三詔贈本官賻錢五萬布百匹  
謚曰隱約左目重瞳子腰有紫志聰明過人好  
墳籍聚書至二萬卷京師莫比少時孤貧丐于  
宗黨得米數百斛爲宗人所侮覆米而去及貴  
不以爲憾用爲郡部傳嘗侍讌有妓師是齊文  
惠宮人帝問識座中客不曰惟識沈家令約伏  
座流涕帝亦悲焉爲之罷酒約歷仕三代該悉

舊章傳物洽聞當世取則謝玄暉善爲詩任彥  
昇工於文章約兼而有之然不能過也自負高  
才昧於榮利乘時藉勢頗累清談及居端揆稍  
弘止足每進一官輒殷勤請退而終不能去論  
者方之山濤用事十餘年未嘗有所薦達政之  
得失唯唯而已初高祖有憾於張稷及稷卒因  
與約言之約曰尚書左僕射出作邊州刺史已  
往之事何足復論帝以爲婚家相爲大怒曰卿  
言如此是忠臣邪乃輦歸內殿約懼不覺高祖

起猶坐如初及還未至牀而憑空頓於戶下因  
病薨齊和帝以劍斷其舌召巫視之巫言如夢  
乃呼道士奏赤章於天稱禪代之事不由已出  
高祖遣上省醫徐奘視約疾還具以狀聞先此  
約嘗侍讌值豫州獻栗徑寸半帝奇之問曰栗  
事多少與約各疏所憶少帝三事出謂人曰此  
公護前不讓卽羞死帝以其言不遜欲抵其罪  
徐勉固諫乃止及聞赤章事大怒中使譴責者  
數焉約懼遂卒有司諡曰文帝曰懷情不盡曰



隱故改爲隱云所著晉書百一十卷宋書百卷  
齊紀二十卷高祖紀十四卷邇言十卷謚例十  
卷宋文章志三十卷文集一百卷皆行於世又  
撰四聲譜以爲在昔詞人累千載而不寤而獨  
得胸衿窮其妙旨自謂入神之作高祖雅不好  
焉帝問周捨曰何謂四聲捨曰天子聖哲是也  
然帝竟不遵用

陳吏部尚書姚察曰昔木德將謝昏嗣流虐慄  
慄黔黎命懸晷漏高祖義拯橫潰志寧區區

謨帷幄寔寄良平至於范雲沈約參預締構贊  
成帝業加雲以機警明瞻濟務益時約高才博  
洽名亞遷董俱屬興運蓋一代之英偉焉

訓德賦

有序

齊謝朓

朓

右衛沈侯以冠世偉才眷余以國士以建武二  
年余將南牧見贈五言余時病旣以不堪蒞職  
又不獲復詩四年余忝役朱方又致一首迫東  
儲寇亂良無暇日其夏還京師且事讌言未遑  
簾章之思沈侯之麗藻天逸固難以報章且欲  
申之賦頌得盡其體物之旨詩不云乎無言不  
訓無德不報言旣未敢爲訓然所報者寡於德  
耳故稱之訓德賦其辭曰

悲夫四游之代序六龍驚而不息輕蓋靡於駿  
奔玉衡勞於拊翼嗟歲晏之歎歡曾陰默以悽  
惻玄武伏於重介宛虹潛以自匿覽百物之用  
捨相群方之動植吊悴軀於蕪省理衣簪而自  
敕思披文而信道散忿懣於胸臆嗟民生之知  
用知莫深於知己彼知己之爲深信懷之其何  
已牽弱葛之蔓延寄陵風於松柏指曲蓬之直  
達固有憑於原泉彼排虛與蹠實又相鳴於林  
沚興伐木於友生詠承筐於君子矧景行之在

斯方寄言於同耻求相仁於積習寓神心於名  
理惟敦牂之旅歲寔興齊之二六奉武運之方  
昌覩休風之未淑龍樓儼而洞開梁邸煥其重  
複君奉筆於帝儲我曳裾於皇穆藉風雲之化  
景申遊好於蘭菊結德音而爲佩帶芳猷而爲  
服援雅範以自綏懿前脩之所勗昔仲宣之高  
穎寔中郎之倒屣及士衡之籍甚託壯武之高  
義有杞梓之貞心勸丹采之輝被伊吾人之陋  
薄雖黼藻之何寘惟風雅之未變知雲網之不

廊譬層棟之將傾必華榱之先落翳明離以上  
賓屬傳體於纖萼周二輝而分崩擠九鼎於重  
壑雖魚鳥之欲安駭風川而回薄微天道之布  
新嗟員首其焉託余窘迹以多愧塊離尤而獨  
處君紆組於名邦貽話言於川渚悵分手於東  
津望徂舟而延佇慮古今之爲隔豈山川之云  
阻賴先德之龍興奉英靈之電舉事紫泥之密  
勿腰青綬而容與沾後惠以竭來竟卒獲其咲  
語我艤舟以命徒將泊徂於南夏旣勗余以爛

戒又引之以風雅若笙簧之在聽雖舒憂而可  
假昔疢病於漳濱思繼歌而莫寫恩靈降之未  
已奉京扮而作傳臨邦塗之永陌懷余馬於騏  
驎望平津而出宿登崇岡而興賦顧歸幃之南  
迴引行鑣而東驅何壞才之博侈申贈辭於萱  
樹指代匠而切偲比治素而引喻方含毫而報  
章迫紛埃之東鶩釋末位以言歸忽乘驛以南  
赴連篇章之莫訓欲寄言於徃句類鍛翮之難  
矯似洞源之不注意搔搔以杼軸魂營營而馳

驚爾腰戟於戎禁我拂劍於郎闈願同車以日  
夜城望昏而掩扉時遊盤以未極睠落景之徂  
輝苦清顏之倏忽恡懽賞之多違排重關而休  
肯知南館之有依驂職門以右轉僕望路其如  
歸忘清漏之不緩惜曉露之方晞聞夫君之東  
守地隱蓄而懷僊登金華之間道得石室之名  
篇悟寰中之迫脅欲輕舉而捨旃離寵辱於毀  
譽去天伐於腥羶忽攜手以上征躋中皇之脩  
迥巾帝車之廣軾棹河舟之輕艇歷星街之燭



燿浮天潢之溟溟機九轉於玉漿練七明於神  
鼎吹萬化而不暄度千秋之可並齊天地於倏  
忽安事人間之紆姪哉

贈沈左衛

梁范雲

伊昔霑嘉惠出入承明宮  
遊息萬年下經過九龍  
申越鳥憎北樹胡馬畏南風  
願言反漁蓑津梁肯見通

送沈記室夜別

梁范雲

桂水澄夜氛楚山清曉雲  
秋風兩鄉怨秋月千里分  
寒枝寧共採霜猿行獨聞  
桐蘿正憶我折桂方思君

題沈隱侯八詠樓

唐崔顥

梁日東陽守爲樓望越中綠牕明月在青史古  
人空江靜聞山狄川長數塞鴻登臨白雲晚流  
恨此遺風

沈僕射休文

明胡應麟

六代更廢興文士故不乏奮迹驚才賢乘時見  
髦傑猗歟沈隱侯文章何燁燁騁望遊中台違  
情守東越珮玉辭巖廊鳴金下閭闔沿泳雙溪  
流遲徊三洞穴會圃臨春風登臺望秋月旌旆  
俄飛揚劍履倏騰蹈一代懷龍門千秋仰驥秣

四塾啓後流八病表先達盡剖洪荒秘卓爲藝  
林筏儒生互雌黃志士競鈇鉞寥寥數千載風  
流竟誰越豈伊腐草流塵土共澌滅

遺事

沈約製郊居賦，思積時，乃要王筠示其草筠。

讀至雌霓。

五激反。

連聽約撫掌欣忭，曰：「僕嘗恐人

呼爲霓。

五賜反。

次至墜石礪星及冰懸墻而帶坻

等，擊節稱贊。約曰：「知音者希，眞賞殆絕。所以相

要政在此數句耳。」

王筠傳。

凡五輅之蓋、旌旗之質及繫纓皆從方色，蓋裏

並黃雕飾如一。沈約曰：「金象革木，禮圖不載其

形，今流數羽葆，並同玉輅，左建旒。

隋書禮志。

始安王遙光反沈約初聞難馳車趨西掖門或  
勸戎服約慮外軍已至若戎衣或者謂同遙光  
無以自明乃朱服而入

臨汝侯傳

沈約撰宋書疑立袁粲傳以齊武帝帝曰袁  
粲自是宋家忠臣約又多載孝武明帝諸事上  
語約曰我昔經事宋明帝卿可思諱惡之義於

是多所省除

王智深傳

丹陽山南得瓦物高五尺圍四尺上銳不平蓋  
如合焉中得劍一瓷具數十時人莫識沈約云

此東夷罍也。葬用之代棺。此制度卑小則隨

當時矣。東夷死則坐葬之。武帝服其博識。

史系

溝上有老翁乞食。沈約日以饌供之。翁一旦謂  
沈曰：「晚大雨，公可來避。」及晚，與坐茅簷下。雷電  
旁午，霹靂政何。沈下，翁以手接得之，紅如新出。

爐鐵翁忽不見。今霹靂溝是。

柳新編

元和初，陸喬家于丹陽。一夕風月晴瑩，有扣門  
者，衣冠甚偉，延入與坐，請其名氏曰：「我沈約也。」  
喬驚曰：「某一賤士，不意見歸。既而命酒，約曰：『吾

友范僕射子知之乎喬曰熟范公名久矣約命  
侍者邀范頃之雲至曰休文安得至此約曰吾  
慕主人能詩步月來耳遂相談謔久之雲謂約  
曰昔我與君俱遊竟陵之門笑語盧博此時之  
懽不可追矣及禪代稱佐命臣雖位甚崇而心  
常憂惕諸葛長民有言貧賤常思富貴富貴又  
履危機此言豈虛哉約吁嗟久之雲又歎曰自  
梁及今江山風月不異當時但人物潛換耳約  
曰吾爲郢州記室夢一人相告曰君位當至端



揆然終不及台司及吾爲令僕論者頗以此見  
許而終不得乃知人事無非命也時夜已分約  
曰可返矣因相與歸

宣室志

集評

作文衆製五言最優詳其文體察其餘論固知  
憲章鮑明遠也所以不開於經論而長於清怨  
永明相王愛文王元長等皆宗附之于時謝朓  
未邁江淹才盡范雲名級故綴故約稱獨步雖  
文不至其工麗亦一時之選也見重閭里誦詠  
成音約所著旣多今剪除涇雜收其精要允爲  
中品之第矣故當詞密於范意淺於江也

詩品  
○南

史云鍾嶸嘗求譽於約約拒之及約卒嶸品  
古今詩言其優劣蓋追宿憾以此報之也

沈隱侯曰文章當從三易易見事一也易識字  
二也易誦三也邢子才常曰沈侯文章用事不  
使人覺若胸臆語深以此服之祖孝徵亦嘗謂  
吾曰沈詩云崖傾護石髓此豈似用事耶邢子  
才魏收俱有重名時俗準的以爲師匠邢賞服  
沈約而輕任昉魏愛慕任昉而毀沈約每於談  
讌辭色以之鄴下紛紜各有朋黨祖孝徵嘗曰  
任沈之是非乃邢魏之優劣也

顏氏  
家訓

隱侯斟酌二南剖陳三變攄淵雲之抑鬱振潘

歷之風徽俾律呂和諧宮商輯洽不獨子建總

建安之霸客兒擅江左之雄

舊唐書  
文苑傳

佳處斲削清瘦可愛自拘羈病唐諸家聲律皆

出此

詩譜

沈約范雲之作如閶闔疎鐘建章清漏不棘不

舒有節有度

竹林  
詩評

沈休文在梁大家聲價猶宋之有康樂齊之有

玄暉也然邊幅位置較二謝稍窄平生年少日

一首聲實風雅十九首中所難似又非康樂玄

暉所能曆手

歸詩